

# Mlada zvijezda španskog Rafaela Nalda Parera i svjetskog tenisa



**N**a prvi pogled, pomislili biste da ste na teniskom poprištu ugledali potomka Indijanaca. Na to upućuju opasan pogled i jake crte lica karakteristične upravo za domoroce americkog tla. Greška. Izgled često vara, što važi i za ovaj slučaj. Riječ je zapravo o tinejdžeru iz Španije, vanserijskom talentu bez kojeg su sada najveća svjetska takmičenja gotovo nezamisliva. Nadugačko i naširoko sa svojih nepunih 19 ljeta ispisao je istoriju "bijelog sporta". Mečevi Rafael Nadal Parera prava su remek djela, a ko se suprotstavi razornoj ljevici zvijezde u meteorskom usponu, dugo će je pamtili i osjećati na svojoj koži. Mnogi teniski asovi već jesu.



Sa nepunih 15 godina uhvatio u koštac sa "velikim momcima" i odmah zaprijetio šokirajući i otpisujući favorite najavivši da "žestoki Španac" vrijedi i da će obilježiti godine koje dolaze. Niska uspjeha uspostavljena prije četiri godine nastavlja se iz nedjelje u nedjelju, godine u godinu a šire dimenzije tek treba da poprime.

Popularni "Rafi" prve teniske korake načinio je u petoj godini, pod budnim okom ujaka Tonija koji je i danas trener zlatnog dečka "furije". Nadal dolazi iz istog mjesta, Majorke, odakle i njegov idol, prvi reket Španije, Carlos Moya. Kad se kockice poslažu onda sve dolazi kao servirano. Tako je bilo i u slučaju mladog Nadala, uz naravno ogroman rad, trud i odricanja. Ne samo da mu se ostvario san da već u juniorskim danima sparinguje sa "zvijezdom vodiljom" čuvenim Moyom, već je za kratko vrijeme doživio da na terenu "tuče" idola, a zatim u tandemu sa njim, podari svojoj zemlji "salataru". Imamo dokaz da bajke ipak postoje. Drugi ujak teniskog dijamanta iz Majroke je Miguel Anhel Nadal, čuveni reprezentativac fudbalske selekcije Španije i igrač FK Barcelone. Eto na koga se ugledao Rafael, samo što je izabrao drugi sportski poziv. Kao 15 godišnjak, Rafael je napravio sjajan rezultat na Challengeru u Seville, a 2002. dobio i prvi ATP meč u Majorci savladavši

Ramona Delgada. Time je postao deveti igrač u istoriji koji je dobio jedan ATP meč prije nego što je napunio 16 ljeta. Iste godine igrao je uglavnom futurese, osvojio 6 i ostvario skor od 37 pobjeda i samo 3 poraza. Igrao je i polufinale Challengera kada je savladao Carpentiera, Calatravu, Montanesa, a izgubio od Portasa.

Naredna, 2003. sezona može se okarakterisati kao godina snova za maestra Rafaela, u kojoj je oborio rekord Michaela Changa i postao najmlađi igrač koji je kročio u krug 100 veličanstvenih. Završava u top 50 nanizavši impresivne rezultate na ATP i Challenger takmičenjima. U prva tri mjeseca nanizao je 19 pobjeda i 5 poraza na Challengerima, osvojio jednu titulu (Bartlett) i odigrao tri finala (Hamburg, Serborg i Callari). Na Challengeru u Hamburgu nije izgubio ni set do finala, gdje ga je zaustavio Hrvat, Mario Ančić.

Kvalifikovao se i za prvi glavni turnir iz Masters serije u Monte Carlu gdje je savladao Karla Kuceru, šampiona Roland Garrosa Alberta Costu i izgubio od Argentinca Guillerma Corie. Dvije nedjelje kasnije odigrao je još jedno finale Challengera, zatim se kvalifikovao za turnir iz Masters serije u Hamburgu gdje je ostvario fantastične pobjede nad Mathieu i zemljakom Moyom izgubivši od Argentinca Gastona Gaudia. Očekivao se Nadalov bljesak na drugom Grand slamu u sezoni, Roland Garrosu, ali ga je zbog povrede koju je zadobio na treningu, propustio. Vratio se na teren na Wimbledonu i postao najmlađi igrač koji je ušao u treće kolo takmičenja na londonskoj travi, još od vremena kada je to učinio sa 16 g. Boris Becker, 1984.

Savladala je, munja iz Španije Maria Ančića na startu, zatim Childsa, ali ne i Srichaphana. Na šljaku prelazi u julu i igra prvo ATP četvrtfinale karijere u Baastadu, dvije nedjelje kasnije igrao je i prvo ATP polufinale u Umagu gdje je izgubio od idola Moje koji je zatim ovaj tunir i osvojio, dok je to Rafi učinio u dubl konkurenciji. Naredne nedjelje, Nadal je uzeo još jedan Challenger trofej u Segoviji i debitovao na US Openu gde je igrao drugo kolo.

Start 2004. donio mu je prvo ATP finale koje je igrao u Aucklandu i izgubio od Hrbatya u tri seta. Debitovao je zatim na Australian Openu izgubivši u trećem kolu od Hewitta. Uslijedili su: četvrtfinale u Dubaiju, četvrto kolo u Miamiu i četvrtfinale u Estorilu kada je zaradio povredu zbog koje je morao na pauzu od tri

mjeseca.

Vratio se u Baastadu i izgubio u četvrtfinalu od Gaudija. Najbolja nedjelja u sezoni 2004. za Nadala, bila je u Sopotu u avgustu kada se dokopao ATP turnira. Godinu završava sa najvećom zaradom u karijeri 447,758 dolara.

Kruna svega je nastup za Davis cup selekciju Španije i osvajanje "salatare". Rafael je na domaćem terenu u pravoj navijačkoj groznici pred oko 27.000 vatrenih teniskih poklonika Španije donio najvažniji poen u meču sa Amerikancima. Savladao je svjetski "reket broj 2", servis bombardera Andya Roddicka i otišao u istoriju.

I 2005. Rafael je krenuo snažno. Uzeo je titulu u dublu u Dohi. Ponovila se priča u Australiji iz prethodne godine, pa je ponovo pao na trećoj stepenici od Hewitta.

Španci su uvijek imali sjajne tenisere, koji su nosili svjetsku slavu. Rafael je na putu da ih sve nadmaši. Za razliku od svojih zemljaka koji su tipični šljakaši, Nadal je velemajstor za sve podloge. To je do sada "more" puta dokazao.

-Cilj mi je da ovu sezonu završim u top 15. Smatram da bi to bilo objektivno- vjeruje u svoje mogućnosti mlada zvijezda španskog i svjetskog tenisa.

Nadal je trenutno na 48. poziciji singla ATP liste. Najbolji rang u singlu imao je 2004. kada se nalazio na 34. poziciji, dok je u dublu 40. na svijetu.

## LIČNA KARTA

**Datum rođenja:** 3. jun 1986. (Majorca)

**Roditelji:** otac Sebastian i majka Ana Maria Ima mlađu sestru Mariju Izabel (13 god.)

**Visina:** 186 cm

**Težina:** 81 kg

**Profesionalac od:** 2001.

**Oprema:** Nike

**Reket:** Babolat Aeropro Drive Igra lijevom rukom, dvoručni bechhand.

**Mentor:** Carlos Moya

**Trener:** ujak Toni Nadal

**Titule:** singl- osvojio Sopot i igrao finale u Aucklandu, dubl- osvojio Doha, Chennai, Umag

**Hobi:** fudbal, pećanje, odlazak u bioskop

**Ambicije:** biti igrač u prvih 10 na svijetu